

Rizolve problémas

Prende rizolve problémas

Fexu trankadu! Brinkedu rabatadu! Leti lansadu!
Prende ser un bon rizolvidor di problémas ta djuda
kriansas ser independenti y xinti más avontadi pa
sprimenta kuzas nóvu. Tanbe ta djudá-s gusta di
brinka ku otus algen.

Kel Báziku

Problémas ta ben di tudu fórma y tamanhu. Un kriansa
pikinóti talvês ka ta alkansa lava lósa ô el pode kre un
vólta na skoréga. As vês kes probléma la ta ben ku
sentiméntus grandi.

Rizolve probléma ta kumesa sédu. Bebês ta prende
testandu kuzas rípidamenti. Mésmu kuza ta kontise
ku kriansas pikinóti! Rizolve problémas ta involve
kriatividadi y vontadi di kontinua ta tenta. Ku prátika,
kriansas pode bira mutu bon na rizolve ses dizafiu.

Atenson

Bu ta atxa kes matirial ki sta sublinhadu na bu kit.

Kuzas pa Sprimenta ku Idadis entri 2 y 5 anu

Djobe tudu kau

- Konvida bu fidju pa nhos brinka sukundida. Kada óra
un di nhos ta “sukundi” y ta “djobe.” Ten rizoluson
di probléma na djobe lugar pa sukundi y na diskubri
undi ki algen sta.
- Brinka sukundida ku fantóxi. Mostra bu fidju dos
fantóxi. Dipos sukundi kada fantóxi nun lugar diferenti.
Da bu fidju un dika di kada bês. “Baka sta nun lugar
kenti y konfortável.” “Baka sta tra un djónga.” “Dja bu
atxa-! Baka staba baxu kubertor!”

Kumesa

Midjor manera pa kriansas pikinóti
bira bon na rizolve problémas é
atravês di brinkadera. Brinkadera ta
da kriansas ténpu di sprimenta kuzas
y faze ses skodja.

As vês kriansas ta meste ajuda óra ki
kuzas bira difisil. Nhos trabadja djuntu
pa diskubri un monti di maneras
pusível di rizolve kel probléma. Dexa
bu fidju skodje un suluson pa tenta.
As vês se skodja pode da sértu, as vês
pode ka da. Djuda-l prende ku se éru.
“Di ki otu manera bu podeba tenta-l?”



Más! →

Kuzas pa Sprimenta ku Idadis entri 2 y 5 anu

Dizafius di konstruson

- Dizafia bu fidju pa uza blókus pa konstrui un tóri el sô. Kada bês ki tóri kai, pergunta-l, “Kuzê ki bu pode tenta diferenti di prósimu bês?” Dexa-l tenta y torna tenta otu bês.
- Mistura! Poi otus matirial di konstruson djuntu ku blókus. Dizafia bu fidju pa konstrui un tóri ku blókus, kópus di iogurti, tubus di papel ijiéniku, y kualker otu kuza ki bu tene. Kel-li é más difísil pamódi kes matirial pode ka nkaxa tudu fásilmenti.
- Dizafia bu fidju pa uza blókus pa konstrui un kaza pa un fantóxi. Y si txuba ben? Tenta djunta otus matirial di konstruson pa faze un tétu.
- Sprimenta más dizafiu di konstruson ku blókus y otus kuza ki bu tene. Faze un kaza grandi ki ta kebe más di un fantóxi. Konstrui un kaminhu pa fantóxi trabesa strada. Konstrui un kuza grandi ki bu fidju y fantóxi ta kebe di déntu djuntu. (Talvês bu ta meste poi trabiseru y kubertor!)



Interasons di Dia-Dia

Uza óra di rifeison pa pratika rizolve probléma. “Dja N odja ma bu lansa leti. Asidenti ta kontise. Kuzê ki bu pode uza pa djuda linpa?”

Óra ki nhos ta lê un livru, distaka rizoluson di problémas. Pergunta bu fidju kal ki éra probléma y módi ki el foi rizolvidu. El tene otus ideia di módi ki el podeba rizolve kel probléma?

Dimonstra, Rapara, Pratika

“N ka sta konsigi abri es bólsa. N pode uzaba tizora. Kuzê más ki N pode sprimenta?”

Dimonstra óra ki bu sta rizolve un probléma. Pidi bu fidju pa djuda-bu pensa na sulusons pusível.

“Bu prifiri brinka ku kel otu karinhu invêns di toma di-sel. Kel-la foi un atitudi bunitu di-bo.

Rapara óra ki bu fidju faze un bon skodja pa rizolve un probléma. Uza palavras spisífiku pa djuda-l odja kuzê ki foi bon na se skodja.

“Dja N odja ma kel-la ka sta funciona mutu dretu. Kuzê más ki bu podeba tenta”

Pratika pensa djuntu. Faze preguntas sima, “Kuzê ki bu ta atxa ma bu debe faze dipos?” “Bu ta pode uza es objétu? N ta imajina módi...”